

Peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuut. Ataatsimiititaliarsuaq peqqinnissaqarfimmi ataatsimut isigalugu pitsanngorsaattissanik inassuseqaasiussaaq, tassunga ilanngullugit sulisussarsiortarneq, sulisut sulisoriinnarnissat kiisalu Danmarkimik nunanillu allanik suleqateqarneq. Inassuteqaatit peqqinnissaqarfimmi aaqqissuusseqqinnissamut Inatsisartut politikkikkut tunngavigissavaat. Minnerpaamik peqqinnissamik suliaqartut kattuffii aamma soqutisaqartut Kalaallit Nunaanni peqqinnissaqarfissaqarfimmi suliaqarnermik ilisimasaqartut ataatsimiititaliarsuarmi sinniisoqassapput.

(Inatsisartunut ilaasortaq Tillie Martinussen, Suleqatigiissitsisut)

Akissutitut allakkiaq

(Peqqissutsimut, Isumaginninnermut Inatsisinillu Atuutsitsinnermut Naalakkersuisut)

Aappassaaneerpeqarnera

Ilaqutariinnermut Peqqissutsimullu Ataatsimiititaliami ilaasortat isumaliutissiissutaannut, uunga tunngasumut: peqqinnissaq pillugu ataatsimiititaliarsuup sulinissaanut tunngavissiamik UPA2020-mut siunnersuummik saqqummiusseqqullugit Naalakkersuisut peqquneqarnissaannik aalajangiiffigisassatut siunnersuummut Naalakkersuisut qujapput.

Naalakkersuisut oqaluuserisassaq siullermeerpeqarnerani allannguutissatut siunnersuummik saqqummiipput, ataatsimiititalialli siunnersuut siulleq akuersissutigineqarnissaanut inassutigineqarnera tusaatissatut tiguaat.

Naalakkersuisut siunnersuuteqartoq isumaqatigaat nunatsinni peqqinnissakkut pilersaarusiorderup aaqqissuuteqqinneqarnissaa pisariaqartoq, taamaasilluni peqqinnissakkut pisariaqartitat aallaavigalugit siunissami naleqqussarnissaa kiisalu suliamik ilisimasalinnik soqutigisaqartut aamma peqatigiiffiit peqqinnissaq pillugu ataatsimiititaliarsuarmi peqataatinneqarnissaat pingaaruteqartoq.

Taamaattumik Naalakkersuisut aamma siunnersuutigaat ataatsimiititaliarsuup tunngavigisassaa peqqinnissakkut inatsit maannamut atuuttoq nalilersornissaanut aaqqissuuteqqinnissaanullu siunertaqartinneqarnissaa. Inatsit maanna atuuttoq *Peqqinnissaqarfiup sullissineri il.il. pillugit Inatsisartut peqqussutaat nr. 15, 6. november 1997*-imeersoq, sananeqarpoq piffissami peqqissutsip inissisimanagera aamma unamminartut allaagallarmata, nalilerneqarportaaq tulluassasoq peqqinnissaq pillugu ataatsimiititaliarsuaq nutaamik inatsisiliornissamik pisariaqartitsineq nalilersussagaat.

Taamatut oqaaseqarlunga Naalakkersuisut siunnersuut akuerineqarnissaanut inassuteqaateqarput.